

Lapset sait lua taitetta uimahalliin

"Niitten seinämaalaukset jäävä niile elinikäseksi muistoksi"

HAAPARANTA

Kielikoulun esikoululuokka oon, yhtheistyönä

Ruottinsuomalaisen kansanopiston taitheen oppilhaitten kans, muuttanu paatitalon surkean petonkiseinän seinätaitheeksi.

Toissa viikon tuorestaina kielikoulun esikoululuokka kävi Haaparannan paatitalossa viimisen kerran tälle lukukauele – eikä niiltä ylpeyttä fatastannu ko net marsit huohneesheen, jossa oon pieni lasten pasänki.

Siinä, nähkääs, 13 lasta/esikoululaista oon muuttanu surkean petonkiseinän taitheeksi. Taustana oon se, ette

Ruottinsuomalaisen kansanopiston taitheen linja aikasemmin kevväilä sai kysymyksen pienen pasänkin seinien koristamisesesta/maalaamisesta.

– Met haamutimma yhen seinistä ja tehimä siinä työtä pari viikkoa huhtikuussa, taitheen oppilas Jesper Leppänen selittää.

Färiä ja mielikuvitusta

Kielikoulun petakooki Annmari Smeds sai kuula taitheen oppilhaitten prošektista ja sai aatoksen.

– Mie vain kysyin eikö meän lapsetki saattas olla myötä ja hoitaa yhtä seinää – ja se kävi päin. Sitte koulun lapset oon saahneet piirtää haamutelmiä eri vesielläimistä, se selittää ko Haaparannanlehti käypi kattomassa lopputulosta. Entinen surkea seinä oon nyt muutettu mereksi, joka oon täynä jänniä, mielikuvituksellisiä elläimiä.

– Paatitalon paikan päälä met olema panheet haamutelmiä ouverhetile ja sitte lapset oon maalanheet haamutelmien avula seinilä olevat mallit. Sitte net oon maalanheet petonkifäriä

erilaisia färikirjoja, Smeds sanoo.

Kuninkas ja merikissa

Kira Rasimus, seittemän vuotta, on yks taiteilijoista, joka ”fröökynä” apuna selittää, ette hänen vesiellän on musta ellän, jolla on punanen kruunu ja sen nimi on meren kuninkas.

– Oli hauska maalata, se sanoo.

Ko Haaparannan lähättämä kyssyy Hugo Tervahaualta, se viittaa yhtä vaaleansinistä vesielläintä.

– Se on merikissa, Hugo selittää ennen ko on hänen ja kaverien aika hypätä pasänkhiin viimisen kerran tälle tärmiinalle.

Jesper Leppänen ja sen kaverit, jotka on luohneet taitetta isole seinäle, selittävä ette aatos on koristaa pitkän seinän suuressa uimahallissa sienämaalauksella.

– Toivon, ette met saama olla siinäki myötä pikkusen. Tästä pienen pasänkin luomispuohasta tulee elinikänen muisto lapsile, sanoo Annmari Smeds.

Bild1 FI Kielikoulun esikoulun oppilhaat, jotka sait muuttaa surkean Haaparannan paatitalon petonkiseinän seinätaitheeksi.

Bild 2 FI Niin tuttuja ko tuntemattomia vesielläimiä koristaa ny lasten pasänkin seinät.

Meänkielennös. Bengt Pohjanen

EKALE: Lasten luomia vesielläimiä paatitalossa